

Tarikh Dibaca: 02 DIS 2022M | 07 Jumadal Ula 1444H



ISLAMIC • SAVIOUR • OBEDIENCE

KHUTBAH JUMAAT

Tajuk:

“AZAN DAN KEFARDUAN SOLAT”

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR



“AZAN DAN KEFARDUAN SOLAT”

الْحَمْدُ لِلَّهِ الْقَائِلِ: يَا أَيُّهَا الَّذِينَ ءَامَنُوا إِذَا نُودِيَ لِلصَّلَاةِ مِنْ يَوْمِ
الْجُمُعَةِ فَاسْعَوْا إِلَىٰ ذِكْرِ اللَّهِ وَذَرُوا الْبَيْعَ ذَلِكُمْ خَيْرٌ لَّكُمْ إِنْ
كُنْتُمْ تَعْلَمُونَ ﴿٩﴾¹

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ
مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلَىٰ سَيِّدِنَا مُحَمَّدٍ
وَعَلَىٰ آلِهِ وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ اتَّقُوا اللَّهَ، أُوصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ.

قَالَ اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ ﴿١٠٢﴾²

Muslimin yang dirahmati Allah sekalian,

Marilah kita tingkatkan ketakwaan kehadiran Allah SWT, iaitu dengan melaksanakan segala perintah-Nya dan meninggalkan segala larangan-Nya. Mudah-mudahan kita dapat keredhaan-Nya di dunia dan diakhirat.

Tajuk khutbah kita pada hari ini ialah **“AZAN DAN KEFARDUAN SOLAT.”**

¹ al-Jumu'ah: 9.

² ali-Imran: 102.



Muslimin yang mulia,

Seruan Azan sebelum mendirikan solat mula disyariatkan ketika Rasulullah SAW berhijrah ke Madinah. Hal ini berdasarkan Firman Allah SWT ayat 9 surah al-Jumuah yang telah dibaca permulaan khutbah ini. Ia bermaksud:

“Wahai orang-orang yang beriman! Apabila diserukan azan untuk mengerjakan solat pada hari Jumaat, maka segeralah kamu pergi (ke masjid) untuk mengingati Allah (dengan mengerjakan solat Jumaat) dan tinggalkan berjual beli (pada saat itu) yang demikian adalah baik bagi kamu, jika kamu mengetahui (hikmah yang sebenarnya).”

Hal ini diperkukuhkan lagi dengan hadis daripada Ibnu Umar Radiallahuanhuma bahawa Rasulullah SAW bersabda:

إِذَا حَضَرَتُ الصَّلَاةُ فَلْيُؤْذِنْ لَكُمْ أَحَدُكُمْ

“Apabila sampai waktu solat, maka hendaklah azan seorang dari kamu”

(Riwayat al-Bukhari dan Muslim).

Imam al-Nawawi Radiallahuanhu menyatakan bahawa seruan azan mengandungi beberapa hikmah, antaranya;

- i. Memberi tahu akan masuk waktu solat.
- ii. Memberi tahu tempat solat, dan
- iii. Memanggil untuk solat berjemaah.



Orang yang mendengar seruan azan disunatkan menjawab seperti yang diucapkan oleh Muazzin. Hadis daripada Abi Saïd al-Khudri Radiallahuanhu bahawa Rasulullah SAW bersabda:

إِذَا سَمِعْتُمُ النِّدَاءَ، فَقُولُوا مِثْلَ مَا يَقُولُ الْمُؤَذِّنُ

“Apabila kamu mendengar akan seruan (azan) maka kata olehmu seumpama apa yang dikata oleh muazzin.”

(Riwayat al-Bukhari).

Menurut Imam al-Syafie didalam kitab Al-Umm menyatakan amat disukai mereka yang menyahut seruan azan walau dimana mereka berada, sama ada dalam keadaan suci atau berhadas. Kecuali jika dia berada didalam tandas. Pahala sunat bagi mereka mengucapkan seperti yang disebut oleh Muazzin, dan juga pada seruan حَيَّ عَلَى الصَّلَاةِ، حَيَّ عَلَى حَيَّ عَلَى الفَّلَاحِ dijawab dengan لَا حَوْلَ وَلَا قُوَّةَ إِلَّا بِاللَّهِ الْعَلِيِّ الْعَظِيمِ.

Kita juga akan diberikan kelebihan dan ganjaran daripada Allah SWT apabila menjawab seruan azan dan berdoa selepasnya sebagaimana dijelaskan dalam sebuah hadis daripada Saad bin Abi Waqqas Radiallahuanhu bahawa Rasulullah SAW bersabda yang bermaksud:

“Sesiapa yang mendengar muazzin melaungkan azan kemudian membaca أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَنَّ مُحَمَّدًا عَبْدُهُ وَرَسُولُهُ akan diampunkan dosanya.”

(Riwayat Muslim).

Muslimin Rahimakumullah,



Menurut Para Ulama, orang yang benar-benar beriman apabila mendengar panggilan azan, hatinya akan gementar dan takut, terbayang kebesaran dan kekuasaan Allah SWT, segera menyahut seruan tersebut dan meninggalkan sementara urusan dunianya untuk sujud mengadap Allah SWT.

Berbeza dengan mereka yang tertutup hatinya dan jauh dari hidayah Allah SWT, suara azan tidak sedikit pun mengetuk pintu hatinya untuk memenuhi panggilan Ilahi, ibarat kata masuk telinga kanan keluar telinga kiri, hatinya tertutup dari inayah Allah SWT. Mereka ini dikatakan orang yang sombong dan lupa kepada Allah SWT.

Orang yang prihatin tentang tanggungjawabnya kepada Allah SWT, mereka sedia menunggu solat sebelum azan dikumandangkan. Sebagai contoh; kisah Saad bin al-Musayyab, seorang ulama tabiin, ketika hampir ajalnya, datang anak perempuannya menangis disampingnya. Dengan keadaan lemah, Saad berkata; "Wahai anakku, Jangan kamu menangis. Demi Allah, selama 40 tahun ini, tidak pernah seorang melaungkan azan, melainkan ayah sudah berada di masjid." Maksudnya; Saad sudah berada dalam masjid sebelum azan, bersedia untuk menunaikan solat secara berjamaah.

Muslimin yang dirahmati Allah SWT,

Suara azan juga, mengingatkan kita supaya jangan mencuaikan ibadah solat, kerana solat adalah ibadah pertama yang akan ditanya kepada kita di padang Mahsyar kelak. Apakah kita di dunia menunaikan solat atau tidak? Apakah solat kita mengikut rukun dan syarat-syarat sahnya? Apabila solat itu diterima oleh Allah SWT, maka akan diterima



amalan kita yang lainnya. Sebaliknya apabila solat itu ditolak, akan ditolak semua amal ibadah lainnya. Demikianlah pentingnya solat itu.

Hal ini berdasarkan hadis yang diriwayatkan oleh Namir bin Salamah bahawa Rasulullah bersabda:

أَوَّلُ مَا يُسْأَلُ عَنْهُ الْعَبْدُ يُسْأَلُ عَنْ صَلَاتِهِ، فَإِنْ
تُقْبِلَتْ مِنْهُ تُقْبِلَ مِنْهُ سَائِرُ عَمَلِهِ، وَإِنْ رُدَّتْ عَلَيْهِ رُدَّتْ
عَلَيْهِ سَائِرُ عَمَلِهِ

“Soalan pertama yang akan ditanya kepada seorang hamba (manusia tentang amalannya pada hari kiamat), ialah ibadah solat. Jika solatnya diterima (oleh Allah), maka akan diterima seluruh amalannya, dan jika solatnya ditolak (oleh Allah), maka akan ditolak seluruh amalannya”.

(Riwayat Ibnu Abi Syaibah).

Ini bermakna, sekalipun seseorang itu sempurna puasanya, banyak zakatnya, sempurna hajinya, selalu bersedekah menolong fakir miskin, berjasa kepada masyarakat dan negara, tetapi jika tidak mendirikan solat lima waktu, maka seluruh amalannya tidak dapat menjadi bekalan untuk menolongnya pada hari akhirat kelak.

Hadirin sekalian,

Marilah kita memuhasabah diri. Tanyalah kepada diri kita sendiri, apakah yang kita dapat dari solat itu? Sudah berapa lama kita melakukan solat? adakah kita khusyuk ketika menunaikan solat? Apakah solat kita itu mampu mencegah perbuatan keji dan munkar? Sejauh manakah



sempurnanya solat isteri dan keluarga yang menjadi tanggungjawab kita. Persoalan ini perlu kita ambil perhatian supaya kita dan seluruh ahli keluarga tergolong dalam kalangan ahli syurga diakhirat kelak Hadis daripada Jabir Radiallahuanhu bahawa Rasulullah SAW bersabda:

إِنَّ بَيْنَ الرَّجُلِ وَبَيْنَ الشِّرْكِ وَالْكَفْرِ تَرَكَ الصَّلَاةَ

“Sesungguhnya antara seorang lelaki, kesyirikan dan kekufuran itu ialah pada meninggalkan solat.”

(Riwayat Muslim).

Firman Allah SWT dalam surah al-Ma'arij ayat 19-27 yang bermaksud:

“Sesungguhnya manusia itu dijadikan bertabiat resah gelisah (lagi bakhil kedekut). Apabila dia ditimpa kesusahan, dia sangat resah gelisah. Dan apabila dia beroleh kesenangan, dia sangat bakhil kedekut, kecuali orang-orang yang mengerjakan sembahyang. Iaitu mereka yang tetap mengerjakan sembahyangnya, dan mereka (yang menentukan bahagian) pada harta-hartanya, menjadi hak yang termaklum, bagi orang miskin yang meminta dan orang miskin yang menahan diri (daripada meminta), dan mereka yang percayakan hari pembalasan (dengan mengerjakan amal-amal yang soleh sebagai buktinya). Dan mereka yang cemas takut daripada ditimpa azab Tuhannya.”

Berdasarkan ayat ini, kelebihan solat dapat menghilangkan perasaan resah gelisah dan sikap bakhil kedekut. Oleh itu, janganlah solat ditinggalkan kerana solat dapat memberikan ketenangan jiwa dan menghapuskan penyakit hati.



Hadirin sidang Jumaat yang dirahmati Allah SWT,

Bagi mengakhiri khutbah ini, marilah kita hayati saranan berikut:

1. Umat Islam hendaklah mendengar dan menjawab seruan azan serta melaksanakan ibadah solat dengan ikhlas dan khusyuk.
2. Umat Islam hendaklah menyedari, bahawa ibadah solat adalah perintah Allah SWT yang wajib dilaksanakan dalam apa jua keadaan.
3. Umat Islam hendaklah mendirikan solat dengan sebenar-benarnya bukan semata-mata melepaskan kewajibannya menunaikan solat.
4. Umat Islam hendaklah sentiasa memastikan diri dan keluarganya istiqamah dalam melaksanakan perintah Allah SWT terutama ibadah solat.

أَعُوذُ بِاللَّهِ مِنَ الشَّيْطَانِ الرَّجِيمِ
حَافِظُوا عَلَى الصَّلَوَاتِ وَالصَّلَاةِ الْوُسْطَى وَقُومُوا لِلَّهِ قَانِتِينَ ﴿٢٣٨﴾

"Peliharalah segala solat (mu), dan (peliharalah) solat wusthaa. Berdirilah kerana Allah (dalam solatmu) dengan khusyuk."

(al-Baqarah : 238).



بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ
بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ
تِلَاوَتَهُ، إِنَّهُ هُوَ السَّمِيعُ الْعَلِيمُ.
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ الْغَفُورُ
الرَّحِيمُ.



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ
وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَمَنْ تَبِعَهُمْ
بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا
اللَّهَ، أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Hadirin yang dirahmati Allah sekalian,

Marilah sama-sama kita bertakwa kepada Allah SWT dengan melakukan ketaatan kepada-Nya dan menjauhkan diri daripada perbuatan keji dan maksiat.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا
عَلَيْهِ وَسَلِّمُوا تَسْلِيمًا ﴿٥٦﴾

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
أَجْمَعِينَ.



اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ
الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ
وَيَا قَاضِيَ الْحَاجَاتِ. اللَّهُمَّ أَعِزِّ الْإِسْلَامَ وَالْمُسْلِمِينَ،
وَأَهْلِكَ الْكُفْرَةَ وَالْمُبْتَدِعَةَ وَالْمُشْرِكِينَ.

اللَّهُمَّ إِنَّا نَسْأَلُكَ وَنَتَوَسَّلُ إِلَيْكَ بِنَبِيِّكَ الْأَمِينِ، وَنَسْأَلُكَ
بِأَسْمَائِكَ الْحُسْنَى، وَصِفَاتِكَ الْعُظْمَى، أَنْ تَحْفَظَ بَعَيْنِ
عِنَايَتِكَ الرَّبَّانِيَّةَ، وَبِحِفْظِ وَقَايَتِكَ الصَّمَدَانِيَّةَ، جَلَّالَةَ
مَلِكِنَا الْمُعْظَمِ، سُلْطَانَ سَلَاطُونَ، سُلْطَانَ شَرَفِ الدِّينِ
ادريس شاه الحاج ابن المرحوم سُلْطَانَ صَلَاحِ الدِّينِ عَبْدِ
الْعَزِيزِ شَاهِ الْحَاجِ. اللَّهُمَّ أَدِمِ الْعُونَ وَالْهَدَايَةَ وَالتَّوْفِيقَ،
وَالصِّحَّةَ وَالسَّلَامَةَ مِنْكَ، لِيَوْلِيِّ عَهْدِ سَلَاطُونَ، تَعَكَوْ أَمِيرِ
شَاهِ ابْنِ السُّلْطَانَ شَرَفِ الدِّينِ ادريس شاه الحاج، فِي
أَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ يَا ذَا الْجَلَالِ وَالْإِكْرَامِ.
اللَّهُمَّ أَطْلُ عُمْرَهُمَا مُصْلِحِينَ لِلْمُوظَّفِينَ وَالرَّعِيَّةَ وَالْبِلَادِ،
وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah! Kurniakanlah petunjuk kepada kami untuk mendirikan solat fardu lima waktu secara berjemaah, menunaikan zakat melalui Lembaga



Zakat Selangor, mewakaf harta melalui Perbadanan Wakaf Selangor dan menginfakkan harta pada Tabung Infak Jariah Umat Islam Selangor (TIJARI) dan kepada anak-anak yatim melalui Yayasan Islam Darul Ehsan (YIDE).

Jadikanlah kami antara hamba-Mu yang menjaga amanah. Kuatkan iman kami agar menjauhi perbuatan khianat serta jauhkan kami termasuk dalam golongan yang mengabaikan tanggungjawab dan jauhi negeri dan negara kami daripada kehancuran disebabkan perbuatan rasuah. Serahkan tanggungjawab memimpin negara kami kepada hamba-Mu yang amanah dan jujur serta tegas lagi berani menegakkan kebenaran dan melaksanakan keadilan berlandaskan syariat. Jadikanlah Ya Allah masjid dan surau di Negeri Selangor rumah-rumah-Mu yang aman, mempersatukan dan menjadi nadi kekuatan ummah.

Ya Allah! Hindarilah kami daripada semua musibah dunia dan siksaan akhirat. Selamatkan kami daripada malapetaka alam seperti bencana bah dan banjir besar yang sering melanda kami. Sesungguhnya Engkau lah yang berkuasa atas segala sesuatu, Ya Allah.

اللَّهُمَّ يَا دَافِعَ الْبَلَاءِ، اِدْفَعْ عَنَّا هَذَا الْوَبَاءَ وَالْبَلَاءَ وَالْمَرَضَ
وَالشَّدَائِدَ وَالْمِحْنَ، بِلُطْفِكَ يَا لَطِيفُ إِنَّكَ عَلَى كُلِّ شَيْءٍ
قَدِيرٌ وَبِالْإِجَابَةِ جَدِيرٌ.



رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ وَاجْعَلْنَا لِلْمُتَّقِينَ
إِمَامًا. رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ
النَّارِ ﴿٢٠١﴾.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ
وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ
﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعْمِهِ يَزِدْكُمْ،
وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ.